

Farzandlarimiz armiya safida harbiy mutaxassisliklarni egallash bilan birga, jismoniy va ma'naviy jihatdan chiniqib, irodasi toblanmoqda, qat'iy hayotiy pozitsiyasi shakllanmoqda, eng muhimi, ular Vatan himoyasi uchun tayyor turadigan fidoiy insonlar bo'lib kamol topmoqda.

Islom KARIMOV

*Vatan yagonadir, Vatan bittadir!*

*Tong*

# YULDUZI

O'zbekiston Respublikasi bolalar va o'smirlar gazetasi

Gazeta 1929-yil 1-avgustdan chiqib boshlagan

2008-yil  
14-yanvar  
N:3  
(66648)

## 14-yanvar — VATAN HIMOIYACHILARI KUNI



### BAXTLI BOLALIK KAFOLATI

Davlatimiz doimo bolalarga g'amxo'r va mehribon. Kelajagimizning ertasi albatta bugundan boshlanadi. Yurtimizda joriy qilinayotgan chora-tadbirlarning asosiy negizida yoshlarimizning istiqbolli hayot yo'li diqqat-e'tiborda turadi.

Yaqinda O'zbekiston Respublikasining «Bola huquqlarining kafolatlari to'g'risida»gi Qonuni matbuotda e'lon qilindi. Mazkur Qonunning maqsadi, yoshlar huquqlarining kafolatlari sohasidagi munosabatlarni tartibga soladi.

O'zbekiston Respublikasi Prezidentining «Bolalar musiqa va san'at maktablarining moddiy-texnik bazasini mustahkamlash va ularning faoliyatini yana-da yaxshilash bo'yicha 2009-2014-yillarga mo'ljallangan Davlat dasturini tayyorlash chora-tadbirlari to'g'risida»gi Farmoyishi ham yoshlar uchundir. Unda yosh avlodning ma'naviy olami va madaniy boyligini yuksaltirish, shuningdek, musiqa va san'at maktablarining moddiy-texnika bazasini mustahkamlashdek ezgu ishga ham katta e'tibor qaratilgan.

O'ylaymizki, bunday e'tibor Sizlarni yangi-yangi izlanish, san'at sohasini yana-da mustahkamlash, milliy madaniyatimiz ravnaqiga munosib ulush qo'shishingizda muhim omil bo'ladi.

### SEN VATANNI HIMOYA QIL!

Alpomishdek o'g'lonlarim,  
Kuchga to'lgan polvonlarim.  
Mening shirin zabonlarim,  
Ota so'zin sen g'oya qil,  
Vataningni himoya qil!

Chiniq kun-tun, kuchga to'lib,  
Do'stlar bilan inoq bo'lib.  
Ko'z quvonsin baxting ko'rib,  
Ota so'zin sen g'oya qil,  
Baxtingni himoya qil!

Salomat G'OYIBNAZAROVA

### KUVER KUYLARI

Uspenskiy nomidagi Respublika maxsus musiqa akademik-litseyida Elen Kuver fransuz pianinotchilarining fortepyano dasturi tashkil etildi.

### ADIBNING SOVG'ASI BOR

Aziz bolajonlar, eshitmadim demanglar! Gazetamiz sahifalarida davomli chop etilayotgan «Uchar otlar bo'lgan edi» qissasining muallifi, sevimli yozuvchimiz Erkin Malik qissa haqidagi fikr-mulohazalarini birinchilardan bo'lib tahririyatimizga yo'llagan o'quvchiga atab sovg'a hozirlab qo'yibdilar.

Sovg'ani qo'lga kiritay desangiz, qissani diqqat bilan o'qib chiqing. O'z fikrlaringizni tezroq bizga yo'llashga shoshiling!



O'zbekiston Respublikasi bolalar va o'smirlar gazetasi

**Muassislar:**

O'zbekiston matbuot va axborot agentligi,  
O'zbekiston Respublikasi Xalq ta'limi vazirligi,  
«KAMOLOT» yoshlar ijtimoiy harakati Markaziy Kengashi,  
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

**BOSH MUHARRIR:**  
**To'liqin HAYITOV**

Gazeta O'zbekiston matbuot va axborot agentligida 0208-raqam bilan 2007-yil 2-fevralda ro'yxatdan o'tgan.

**TAHRIR HAY'ATI:**

Turobjon JO'RAYEV,  
Dilbar ALIMJONOVA,  
Qahramon QURANBOYEV,  
Jabbor RAZZOQOV  
(«O'zbekiston» NMIU Bosh muharrir o'rinbosari),  
Dilmurod RAHMATILLAYEV,  
Dilshoda DADAJONOVA,  
Feruza JALILOVA  
(Bosh muharrir o'rinbosari),  
Sobirjon SHARIPOV,  
Ergashvov SARIQOV.

**Rassomlar:**  
Nodira MIRZAYEVA,  
Feruz MATYOQUBOV

Dizayner va sahifalovchi:  
**Elyor ESHCHONOV**  
Navbatchi:  
Ma'mura MADRAHIMOVA

**Manzilibiz:**  
700129,  
Toshkent shahri,  
Navoiy ko'chasi, 30-uy.  
Obuna indeksi-198.  
e-mail: tong1924@mail.ru

**Tel:** 144-27-25, 144-63-08  
**Tel./faks:**  
(99871) 144-38-10

«O'zbekiston» nashriyot-matbaa ijodiy uyida chop etildi.  
Haftaning dushanba kuni chiqadi.  
Shakli A-3,  
2 bosma taboq.


**Adadi - 54775**  
**Buyurtma N: J 4565**

# YOSHLARGA E'TIBOR

Prezidentimiz Islom Karimov tashabbusi bilan jamiyatimizning barcha sohalarida yosh avlodni mustaqil va teran tafakkur sohibi, sog'lom va barkamol insonlar etib tarbiyalash borasida katta ishlar amalga oshirilmoqda. Bunday ishlar jamoat tashkilotlari, jumladan, «O'zbekiston madaniyati va san'ati forumi» jamg'armasi faoliyatining ham ustuvor yo'nalishlaridan hisoblanadi. Jamg'armaning fan, ta'lim, madaniyat, san'at, sport sohalarida tinimsiz izlanayotgan, intiluvchan va fidoiy yoshlarni aniqlash, ularning o'z iste'dodini to'liq namoyon etishi uchun barcha imkoniyat va sharoitlarni yaratish, kelgusidagi yangidan yangi ijodiy parvozlar sari undash borasidagi ko'plab ijodiy loyihalari bunga misol bo'la oladi. Ushbu jamoat tashkiloti tashabbusi bilan o'tkazilayotgan «Navqiron O'zbekiston», «Kelajak ovozi», «Yangi avlod» kabi festivallar, ko'rik-tanlovlar, iqtidor egalarining intellektual bellashuvlari, fanlar bo'yicha olimpiadalar, konsertlar, badiiy ko'rgazmalar, ta'lim, pedagogik yo'nalishdagi grantlar dasturi mamlakatimiz yoshlari o'rtasida tobora ommalashib borayotgani bilan yanada ahamiyatlidir. Ayni paytda mazkur loyihalar g'oliblarining faoliyati keyinchalik ham jamg'arma tomonidan qo'llab-quvvatlab boriladi.

# YENGLIK VA QO'LGOPGA QADAR

Qadimda qattiq qish kunlari etakka qadar yetadigan uzun yengli po'stinlar kiyib yurishgan. Yengning ichiga mo'yna qavilgan. Tabiiy, bunday yeng qo'lini hech bir ishga urmaydiganlar uchun mo'ljallangan. Ishlaydigan, mehnat qiladiganlar uchun esa yenglik o'ylab topishgan. Avvaliga teridan tikilgan qopchalar yenglik vazifasini o'tagan. Keyinroq qopchadan bosh barmoq uchun alohida «uycha» ochib berilgan. Vaqt o'tishi bilan beshala barmoq uchun alohida «uychalar» tikiladigan bo'lgan va qo'lqop vujudga kelgan... Sibirlik ayrim ovchilar hozir ham kafti o'yi qo'lqop kiyishadi, bu to'satdan miltiq otish zarurati tug'ilib qolganda, barmoqni chiqarishga mo'ljallangan.



# TA'TILDAGI TOMOSHALAR

Qishki ta'til kelishi bilan bolajonlar uchun haqiqiy bayram boshlanadi, desak yanglishmaymiz. Sababi, qishki ta'til aynan Yangi yil tantanalariga ulanib keladi-da.

Bu yil ham har yildagidek shahrimizning turli joylarida bolajonlar uchun archalar bezatilib, bayram tadbirlari o'tkazildi. Bayram tadbirlaridagi ertak qahramonlari ezgulik va yovuzlik timsollarida namoyon bo'lib, yaxshilik doimo yomonlikni yengib chiqishini sahna ko'rinishlarida ijro etib berdilar. Ayniqsa, sirk tomoshalariga tashrif buyurgan bolajonlar «Zolushka» ertagini tomosha qilish bilan bir vaqtda, sahnadagi turli o'rgatilgan hayvonlarni ko'rib, hayajonlarini yashira olmadilar.

Bu yilgi qishki ta'til ham Qorbobo-yu Qorqizlari, turli tomoshalari bilan bolajonlar qalbida o'chmas iz qoldirdi.




Bizning maktab-internatimizda «Adolat qutisi» tashkil etilgan. Bu qutiga jamoa a'zolari, o'quvchilar tomonidan maktab hayotidagi turli xil kamchiliklar, yo'l qo'yilayotgan xatoliklar yozib tashlanadi. Har chorshanba kuni barcha jamoa a'zolari va o'quvchilar ishtirokida «Adolat qutisi» ochiladi va undagi xatlar olib o'qilib, yo'l qo'yilgan xato va kamchiliklar shu yerning o'zida bartaraf etiladi. Bu esa ixtisoslashtirilgan maktab-internatida ta'lim mazmunini


# ADOLAT QUTISI

rivojlantirishga, yoshlarni komil insonlar qilib tarbiyalashga yordam beradi.

**Hasanboy MURODOV,**  
Andijon viloyati, Ulug'nor tumanidagi  
16-ixtisoslashtirilgan maktab-internatining  
8-sinf o'quvchisi



# MUZLATKICHGA QADAR



Oziq-ovqat mahsulotlarini issiqdan saqlashda qishloqlarda yerto'lalar, shaharlarda esa muz bilan sovutiladigan shkaflar qo'l kelgan. Shkaf ustidan erib tushgan muz suvi uning ostidagi

«yashirin» taglika yig'ilgan. (Bunday taglik hozirgi elektr muzlatkichlarda ham bor.) Shu bahona muz bozori chaqqonlashib ketgan. Anhor va ariqlarning qishki muzlari yerto'la va zax joylarda yoz uchun saqlab qo'yilgan. Dastlabki «muz yasovchi» mashinalardan odamlar ajablanishgan: ular o'tin, ko'mir yoki kerosin yoqib ishlatilgan va yerto'ladan ko'ra pechga o'xshab ketgan.



# Mardlar qo'riqlaydi Vatanni!

## Unga havas qilishdi

Tong yulduzi  
14-yanvar

2008

Akasi harbiy xizmatni o'tab qaytgan bolakayni hech kuzatganmisiz? Kattalar bilan ishi yo'q, o'zi bilan o'zi ovora. Akasining kattakon shapkasini kiyib olib, mitti qo'lchasini peshonasiga tiragancha shaxdam odimlaydi. Buyruq beruvchi ham, uni ijro etuvchi ham o'zi. Shapkasini maqtanmagan yana qaysi do'sti qoldi-ya?.. «Xizmatni qanday o'taganingizni gapirib bering», deya akasini ham holi-joniga qo'ymaydi. Nihoyat, charchab uxlab qoladi. Shunda

ham shapkasini qo'lidan qo'ymaydi. Uni mehr bilan ko'tarib o'rniga yotqizayotgan askar akasining ko'zlarida yosh halqalanadi. Axir ukajonining mana shunday tinch va osuda oromini, ota-onasi, qo'ni-qo'shnilari, mahallasi, qo'ying-chi, ona yurtining tinchligini qo'riqlamadimi u?! Yigitlik burchini munosib o'tab, yaqinlari bag'riga yorug' yuz bilan qaytgan mard o'g'lonning sevinch yoshlari edi bu!

Ona zamin har narsaga qodir:



bug'doy noni bilan to'ydiradi, zilol suvlari bilan chanqog'imizni qondiradi, go'zal tabiati bilan zavqlantiradi bizni. U o'zini-o'zi himoya qila olmaydi, xolos. Uni himoya qilish – beminnat non, tuzi bahramand bo'layotgan biz insonlarning vazifamiz, har qarichini qo'riqlash esa mard va jasur o'g'lonlarning muqaddas burchidir.

Toshkent oliy harbiy-texnik bilim yurtida tahsil olayotgan kursantlar ham yaqindagina aksar bo'lishni niyat qilib yurgan bolakay edilar. Endilikda zobitlikni orzulab tahsil olishyapti.

Ular safida buxorolik Feruz Yaxshiyev ham bor.

– Harbiy bo'lish bolalikdagi orzuim edi, – deydi Feruzbek o'ziga yarashib turgan harbiycha kiyimini to'g'rilab. –

– Hozir qiziqayapsan-u, o'qishga kiringach, «bir-ikki» deya safda

yuraverish joningga ham tegib ketadi. Keyin afsuslanib yurmasang bo'lgani, deya maqsadimdan qaytarmoqchi bo'lganlari ham bor edi do'stlarim orasida. Ular qasamyod qabul qilgan kunimiz meni qutlagani kelishdi. Bilim olishimiz, sport bilan shug'ullanib chiniqishimiz, madaniy hordiq chiqarishimiz, boring-ki, biz uchun yaratilgan shart-sharoitlarga havas qilib, kelasi yili mana shu dargohga hujjatlarini topshirishni niyat qilganlari ham bo'ldi.

Darhaqiqat, yurtboshimiz boshchiligida harbiy ta'lim tizimida olib borilayotgan izchil islohotlar o'z samarasini bermoqda. Bilim yurtlarimiz soni ortdi. Qurolli Kuchlar akademiyasining tashkil qilinishi haqida faxr va iftixor bilan gapiryapmiz.

Yoshlarimiz uchun yaratilayotgan ana shunday imkoniyatlardan unumli foydalanayotgan o'g'lonlarimizning maqsad maslagi tayin: bilimli, ilmi, sog'lom va jasur yigitlar bo'lib kamol topish. Zero, ona Vatanni mardlar qo'riqlaydi.

Biz ularga ishonamiz tinch, osuda va farahbaxsh kunlarimizni!

ZAMONBEKA



## SAIDKOZIMNING ORZUSI



J a j j i  
S a i d k o z i m n i  
erkalatib, «doda»  
ham deyishadi.  
Sababi, o'zi hali  
juda yosh bo'lsa-  
da, fikrlari katta-  
larnikidek.

Y a q i n d a  
bog'chasida bayram  
bo'libdi. Mudira opasi  
b o l a j o n l a r d a n  
ulg'aygach kim  
b o ' l m o q c h i  
ekanliklarini birma-bir  
so'rab chiqibdi.

Saidkozim baland ovozda: «Men katta bo'lsam, askar bo'lib, oyijonimni, sizlarni yomonlardan himoya qilaman», deganda, zalda yig'ilgan onajon-u buvijonlar qarsak chalib yuborishibdi.

– Sen askarlarni qayerda ko'rgansan? – deya yana savolga tutibdi mudira opa.

– Televizorda ko'rganman, men ham ulardek mard askar bo'laman, – debdi hozirjavoblik bilan u.

Bo'lgan voqeadan quvonib ketgan onasi, mening himoyachi o'g'ilinam, deya bag'riga bosibdi. Saidkozim anchadan buyon, askarlarning kiyimini olib bering, deya xarxasha qilib yurgan ekan. Ertasi kuniyoq bozorga borib, mana bu kiyimchani topib kelibdi.

Jajji «askar»ning kiyimi o'ziga juda yarashibdi-a, nima deysiz?

Hilola RAVSHANBEKOVA,  
poytaxtdagi 13-maktabning  
9-«V» sinf o'quvchisi

## VATAN MADHI



NARAZMAT

Posbonimiz, farzandimiz  
Ona diyorning,  
Mardlarimiz, payvandimiz  
El ahdi borning.

Unutilmas jang yillari  
Mardlar to'kkan qon,  
Unutmasin g'animlar ham  
Uni hech qachon!

Tinchlik madhi yuraklarda  
Yangraydi, do'stlar.  
Quyosh bo'lib qit'alarni  
Qamraydi, do'stlar.

Sergak, ogoh, fidoiymiz,  
Vatan jonajon.  
Posbonimiz, mardlarimiz  
Tinch bo'lsin jahon!

## BAYRAM TADBIRLARI

Yurtimizda ommaviy vatanparvarlik oyligi e'lon qilinib, ko'plab tadbirlar uyushtirildi.

\*\*\*

Samarqand oliy harbiy avtomobil qo'mondonlik-muhandislik bilim yurtida bo'lib o'tgan ana shunday uchrashuvga o'quvchi va talabalar, yoshlar vakillari, ota-onalar va harbiylar taklif etildilar.

Uchrashuvda mamlakatimiz Qurolli Kuchlari tizimida amalga oshirilayotgan keng qamrovli islohotlar va ularning amaliy ahamiyati xususida so'z yuritildi.

\*\*\*

Toshkent viloyatining Bo'stonliq tumani mudofaa ishlari va Xalq ta'limi bo'limlari hamkorligida tashkil

etilgan tadbirda ishtirok etgan o'quvchilar esa Qurolli Kuchlarimiz hayotini aks ettiruvchi foto-ko'rgazma bilan tanishishdi. Vatan himoyasi naqadar muqaddas burch ekanligini, uning tinchligi va osoyishtaligini ta'minlash har bir yigitning muqaddas burchi ekanligini yana-da teranroq anglab yetishdi.

\*\*\*

Bayramga bag'ishlangan tadbir Yangiyo'l tibbiyot kollejida ham bo'lib o'tdi. Talabalar yurtboshimizning «Milliy armiyamiz – mustaqilligimizning, tinch va osoyishta hayotimizning mustahkam kafolatidir» risolasi asosida davra suhbatlari o'tkazdilar.



## QUTLUG' SO'ZLAR BESHIGI

**Nasiba AHMEDOVA, Farg'ona viloyati, Farg'ona tumani Xalq ta'limi bo'limi mudirasi:**

– Yurtboshimizning «Farg'ona xalqi har narsaga qodir, izlanuvchan, bunyodkorlik iqtidori yuksak xalqdir», degan gaplari bizga hamisha kuch-quvvat bag'ishlaydi.

Yangi yilimiz «Yoshlar yili» ekan, avvalo, aziz yoshlarimizga, «Tong yulduzi»ning muxlislariga sog'lik-salamatlik tilayman. O'qishlarida ulkan yutuqlar hamroh bo'lishini, shuningdek, o'z bilim maskanlarini asrab-avaylashlarini juda-juda xohlayman. Chunki maktab ertangi orzularni, kelajakning yorug' yo'llarini qalbingizga jo etib, ulug' manzillarga yetaklovchi qutlug' dargohdir.

Siz har kuni ana shu qutlug' dargohga qadam qo'yar ekansiz, ustozlaringizdan ajdodlar merosi-yu avlodlar an'anasini davom ettirishni o'rganyapsiz. Bejizga maktabni qutlug' dargoh, qutlug' so'zlar beshigi, deb ta'riflamaymiz-da.

Tumanimizda 62 ta maktab bo'lsa, unda 40 ming nafar o'quvchi ta'lim-tarbiya oladi. O'quvchilarimizning ilmi bo'lishi uchun barcha shart-sharoitlar yaratilgan.

Bugungi kunda o'quv maskanlarimizga katta e'tibor qaratiyapti. Davlat umummilliy dasturining joriy etilishi maktablarimiz qiyofasini, mazmun-mohiyatini tubdan o'zgartirdi. Yangi-yangi zamonaviy o'quv binolari tumanimizning eng chekka qishloq joylarida ham qad rostlayapti.

Men o'qituvchining farzandiman. Oilamizda o'n nafar bola bo'lsak, shundan to'rt nafari pedagog. Onamning sharafli kasbidan doimo faxrlanardik. Ular kechki ovqatdan so'ng, albatta «Qobusnoma» kitobidan pandlar o'qib berardilar. O'n nafar farzand tarbiyasi har kuni ota-onamning diqqat-e'tiborida bo'lgan. Men ham onamdan ibrat olishga harakat qilaman.

Menimcha, oiladagi tarbiyaning asosiy kuchini bolalarga onalar beradilar. Ozoda kiyinishdan tortib, darslarni tayyorlash-u ovqatlanishgacha bo'lgan nazoratning hamma-hammasida biz onalarning o'rni katta.

## Tadbirlar ham tarbiya darsi

**Bumayram SOBIROVA, Farg'ona tumani, 1-O'quvchilar ijodiyot markazi uslubchisi, «Yil ijodkori» ko'rik-tanlovi ishtirokchisi:**

– Meni tumanimizdagi ko'pgina o'quvchilar yaxshi bilishadi. Chunki men ularga quvnoq she'r va qo'shiqlar, tadbir ssenariylarini yozib beraman-da.

O'z ishimni tumandagi 4-o'rta maktabda bolalar yetakchisi vazifasidan boshlaganman. Bolalar bilan ishlashga shu qadar kirishib ketganimdan, deyarli har kuni bir mavzuda tadbir o'tkazishga harakat qilaman. O'quvchilarim bilan birgalikda «Mehribonlik» guruhini tuzganmiz. Ular qishloqdagi yolg'iz yashayotgan keksalarning holidan tez-tez xabar olib turishadi. Bu an'ana

qo'shni 3-maktabda hamon davom etyapti.

Biz yashayotgan joy Vodil qishlog'i deyiladi. Qishlog'imizni baland tog'lar, yam-yashil adirlar o'rab turadi. Shunday go'zal tabiat qo'ynida har bir insonga ilhom keladi. Bolalar davrasida vaqt o'tganini ham sezmay qolaman. Hech qachon zerikmayman. Shundanmi, mehnatlarim munosib baholandi.

Xalq ta'limi vazirligi, viloyat hokimligi, «Kamolot» yoshlar ijtimoiy harakati tuman bo'limi tomonidan bir necha marotaba «Faxriy yorliq», O'zbekiston Respublikasi mustaqilligining 15 yilligi ko'krak nishoni bilan taqdirlandim. Bu mukofotlarning barchasini menga bolajonlar olib berdi.

Kirib kelgan 2008 – «Yoshlar yili» ijodkor o'quvchilar, ularning ustozlari uchun yutuqlar yili bo'lsin!



## IXTIROCHILARGA QANOT BAXSH ETIB

**Rustamjon YO'LDOSHEV, Namangan shahar, Bolalar va o'quvchilar texnik ijodiy markazi direktori o'rinbosari:**

– Texnik ijodiy markazimiz jamoasi o'z oldiga asosiy maqsad qilib, barkamol insonni shakllantirish, ularni kasb-hunarga tayyorlash, iqtidoriga yarasha sharoit yaratib berishdan iborat.

Markazimizda 21 ta to'garak, 96 ta guruh, 976 nafar o'quvchilar mashg'ulotlarda qatnashmoqda. To'garaklarimizga kam ta'minlangan, boquvchisini yo'qotgan, tarbiyasi og'ir bolalarni jalb etishga harakat qilamiz. Bu kabi o'quvchilar bilan yakka tartibdagi mashg'ulotlarimiz o'zining ijobiy samarasini bermoqda.

«Kino-video», «Zardo'zlik», «Tikuvchi» kabi to'garaklari hozirgi zamon talabiga javob bera oladigan texnikalar, kompyuter, tikuv mashinalari bilan jihozlandi. Shahar, viloyat va respublika miqyosida o'tkazilib kelinayotgan barcha musobaqa va tadbirlarda o'quvchilarimiz faol ishtirok etmoqda. Jumladan, o'tgan yili «Sehri yog'du», «Milliy hunarmandchilik» kabi to'garak a'zolari viloyatda birinchi o'rinni qo'lga kiritgan bo'lsa, «Foto» yo'nalishi bo'yicha esa viloyat miqyosida oliy, respublikada 1-o'rinni egalladi.

Bundan tashqari, har bir to'garak xonalarida ma'naviyat burchagi tashkil etilgan. Unda ma'naviyat va milliy istiqlol g'oyasi, milliy qadriyatlarimiz, Vatan tuyg'usi, do'stlik tushunchasi haqida so'z boradi. Shuningdek, to'garak a'zolari o'z devoriy gazetalari ham ega.


Aytishlaricha, har bir bolada takrorlanmas noyob iqtidor bo'ladi. Ana shu iqtidorni shakllantirish, to'g'ri yo'lga yo'naltirish bizning zimmamizda.



**Muhayyo GAFAROVA, Namangan shahridagi 37-umumta'lim maktabi direktori:**

– 2007-yil maktabimiz uchun omadli yil bo'ldi. Ikki qavatli 1254 o'ringa mo'ljallangan yangi bino qurib bitkazildi. Unda 46 ta yorug' va shinam xonalar bor. 76 nafar bilimdon va talabchan o'qituvchilarimiz tufayli maktabimiz o'quvchilari tanlov va fan olimpiada, sport g'oliblari bo'lmoqda.

Yangi yil yangi maktabda o'zgacha nishonlanar ekan. Katta zalimiz shu kuni nafaqat o'quvchilar, balki ularning




## QADRDON MASKANNING SEHRI

ota-onalari bilan ham to'la edi. Men farzandlari bilim olayotgan maskanga tashrif buyurgan har bir ota-onadan minnatdorman. Ular yordamida o'quvchilarimiz bilan ishlash ancha oson kechadi.

Maktabda ishlab keta olarmikinman, deya cho'chirdim. Hozir esa maktabdan uyimga ketishga vaqt topa olmayman. Poytaxtda yashayotgan onamning yonlariga ketgim keladi-yu, ammo bu qadrdon maskanning sehri meni chorlab turaveradi.

Direktorman, deb xonamda o'tirmayman. Faollar zalida doimo biror tadbir bilan band bo'lgan bolalarga qo'shilib she'rlar aytib ketaman, kerak bo'lsa, raqs tushib ham beraman. Chunki ular bilan do'st bo'lsakkina, ko'zlagan maqsadlarimiz sari dadil boramiz. Zero, bolalar tarbiyasiga, ularning maktabdagi har bir kuniga barchamiz birdek mas'ulmiz.



Aziz kitobsevar o'quvchilar,  
O'zbekiston xalq yozuvchisi, ardoqli adibimiz Pirmqul Qodirovning salmoqli romanlarini, bir-biridan mazmundor asarlarini sevib, qidirib o'qishingizni yaxshi bilamiz.

G'afur G'ulom nomidagi nashriyat-matbaa ijodiy uyi yaqinda Siz uchun ajoyib tuhfa hozirladi. Pirmqul Qodirovning qissa, hikoyalar va esdaliklaridan jamlangan «Qadrim» nomli kitobini nashrdan chiqardi. Oltmishinchi yillar boshida yozilgan «Qadrim» qissasining qayta ishlangan nashri, «Olov», «Ilinj», «Jon shirin» hikoyalari, Oybek va Zulfiya haqidagi esdaliklar, muallifning yoshlik yillari to'g'risidagi lavhalar o'rin olgan. Siz ziyarak kitobxonlarimizga ham, ushbu yangi nashr ma'qul bo'ladi va kitob javoningizdan munosib o'rin oladi, degan umiddamiz.

Adibimizning navqiron yigitlik davri haqidagi shirin xotiralariga Sizni ham oshno qilish maqsadida to'plamdan parcha keltiryapmiz.

## SIRLI TILAKLAR

Bundan ellik besh yil avval men 19 yoshli talaba bo'lgan kezlarda, gazetalarga lavhalar yozib yurar edim. O'sha yilning avgust oyida yoshlar gazetasi menga bir topshiriq berdi.

Samarqandda yettinchi sinfni bitirgan o'quvchi qiz Moskvadagi gimnastika musobaqalariga qatnashib, yaxshi baho olibdi. Hozir bu qiz Chirchiqdan beridagi Troisk deb ataladigan sport maktabida ekan. Tez borib u bilan suhbat uyushtirib keling, deyishdi.

Yurib charchamaydigan yigit paytimiz. O'sha kuniyoq aytilgan joyni topib bordim. O'quvchi qizni chaqirib berishdi. Suv bo'yida, daraxt soyasida tikka turib suhbatlashdik. Gaplari ma'nilik, o'zini kattalarday vazmin tutadi. Jussasi kichikroq, ammo pishiq. A'lo o'qir ekan. O'n yoshidan boshlab gimnastika bilan shug'ullanar ekan. Men gazetbon ma'lumotlarni yon daftarchaga yozib oldim. Avtobusda Toshkentga qaytayotib, qizning istarasi dilimga juda issiq tuyulganini sezdim. Albatta, hali voyaga yetmagan o'quvchi. Uch yildan keyin o'ninchi sinfni bitiradi. Suhbatimiz paytida maktabni bitirsam, balki Toshkentga o'qishga kelarman, degani yodimda qoldi. Yaxshi bo'lardi, uch yildan keyin ko'rishib, balki do'stlashib ketish nasib etsa, degan sirli bir tilak ko'nglimdan uchqun sochib

o'tgani yodimda bor.

Oradan ikki kun o'tgach, u haqida yozgan lavham yoshlar gazetasida uzun bir ustun bo'lib bosilib chiqdi. Shundan keyingi uch yilda bu hodisa esimdan ham chiqib ketgan ekan.

1950-yili men universitetning beshinchi kursida o'qiy boshlagan kunlarim Sharqshunoslik fakultetining birinchi kursiga oltin medal bilan imtihonsiz kirgan yoshlar davrasida o'sha qizni ko'rib qoldim. Uch yilda ulg'ayib, yulduzday porlab ko'rindi. Uch yil oldin mening dilimda uchqunlangan sirli tilakka nahotki farishtalar «omin» degan bo'lsa? Yoki taqdir taqozosi deganlari shumi? Balki tasodifdir!?

Darvoqe, o'sha 1950-yilni kursdosh o'rtoqlarim bilan kutib olganda, shunga o'xshash hayajonli tilaklarni men she'rga solib ham aytgan edim.

Gap shundaki, biz talaba bo'lgan 1946-50-yillar universitetda o'zbek qizlari juda kam edi. Bizning tarixchilar tayyorlanadigan sakkiz kishilik guruhimiz hammasi yigitlardan iborat edi. Ulardan biri – keyinchalik akademik bo'lgan Abdurahad Muhammadjonov. Yana biri – taniqli sharqshunos olim, «Temuriylar shajarasi» kitobini yozgan Turg'un Fayziyev edi.

«Uch ildiz» romanida yosh shoir Ochil

## Pirmqul QODIROV, O'zbekiston xalq yozuvchisi

Samadov o'z domlasi Temur Akbarovga o'qib bergan quyidagi sakkiz satr she'rni men 1950-yilni kutgan kechamizda yuqorida nomlari aytilgan kursdoshlarim davrasida o'qib bergan edim. Hozir biz kulib eslaydigan o'sha satrlar quyidagicha:

*Yangi yil, biz sendan sal uyatlimiz,  
Hozir davramizda qizlarimiz yo'q.  
Yaproqsiz gul bo'lmas, sevgisiz yigit,  
Sevginiz bor, ammo sevgilimiz yo'q.*


\*\*\*

*Jo'shqin qalbimizga  
juft keladigan,  
Butun umrimizga  
sherik va safdosh.  
Husndor, mehribon,  
aqlli bir qiz –  
Yangi yil, buni  
ham sendan kutamiz!*

Bu tilakka ham farishtalar «omin» degan ekan, chamasi. O'sha 1950-yilning kuzida mening «Studentlar» degan birinchi kitobcham nashr etildi. Bu kitobcha universitet talabalari davrasida muhokama bo'lganda, mening sirli tilaklarimga sababchi bo'lgan Sofiya ismli qiz ham ishtirok etdi. Ko'p iliq fikrlar aytili. Bularning hammasi oramizda yaxshi munosabat paydo qildi.

Qarangki, endi kelgusi 1951-yilning Yangi yil kechasini bo'lajak umr yo'ldoshim bilan bir dasturxon atrofida kutib oldik. Yulduzimiz yulduzimizga to'g'ri kelishini anglab, 1951-yilning yozida oila qurmoqchi bo'ldik.

Mening otam olti yil avval rahmatli bo'lib ketgan, onam uylanish ixtiyorini o'zimga bergan edi. Shunday bo'lsa ham, o'qituvchi bo'lib ishlaydigan Haydar akam Toshkentga bir kelganda, Sofiyani unga ko'rsatib, niyatimni aytdim. Akam bu



niyatni ma'qul ko'rdi. Qiz tomon rozilik bersa bo'ldi, to'y tashvishi bizga tan, dedi. O'sha 1951-yilning yozida men universitetni imtiyozli diplom bilan bitirib, aspiranturada qoldirildim. Lekin hali uy-joy yo'q, yetishmovchilik ko'p edi.

Sofiyaning ota-onasi hali oila qurishga shoshilma, hech bo'lmasa, ikkinchi-uchinchi kurslarni bitir, ungacha yigit ham uy-joy topar, deyishibdi.

Sofiya Toshkentda qolsa, oila qurmay yashay olmasligimizni sezadi. Bo'lmasa, men Moskvaga o'qishga ketaman, deydi ota-onasiga.

O'sha yillarda oltin medal bilan Moskva institutlariga ham imtihonsiz kirish mumkin ekan. Shu imtiyozdan foydalanib, Moskva texnologiya institutining Toshkentdagi vakillariga hujjat topshirdi.

Men uning Moskvaga o'qishga ketishini «Uch ildiz»da Gavhar nomli qiz obrazida sal o'zgartirib tasvirlaganman. Shu voqea munosabati bilan Mahkamning chekkan iztiroblarini men o'zim boshdan kechirganman.

Faqat Mahkamdan farqli o'laroq men Toshkentdagi aspiranturadan hujjatlarimni qaytarib olib, tavakkalchilik bilan Moskvadagi adabiyot institutiga borganman.

Qozon vokzalida Sofiya meni gullar bilan kutib olgani yodimda qolgan. Xayriyat, aspiranturaga kirish nasib etdi.

1952-yilga kelib, Sofiyaning ota-onalari ham uylanishimizga rozilik berishdi. Samarqandda to'yimiz bo'ldi. Bekoboddan mening onam, aka-uka, qarindoshlarim, Toshkentdan yor-u birodarlarimiz Samarqandga to'yga borishdi.

## Ko'ngilga sayr etgan bolalar

### QUVNAYMIZ DILDAN

Ko'cha oppoqdir,  
Ko'nglim oppoqdir.  
Niyatim ham pok,  
Qish pallasida.

Yangi yil kelar,  
Qorbobo bilan.  
Sovg'alar berar,  
Quvnaymiz dildan.



### USTOZIM

Ustozim mehribonim,  
Mehridaryo ustozim.  
Onamdek mehribonlar,  
Mening aziz ustozim.

– Yomon ishga qo'l urmagin,  
Yomonlar bilan yurmagin,  
– deb doimo tushuntirar,  
Qalbi daryo ustozim.

**Nurjahon UBAYDULLAYEVA,**  
Toshkent shahar,  
Shayxontohur tumanidagi  
254-maktabning 4-«D» sinf  
o'quvchisi

## YOSHLAR YILI

Pag'a-pag'a qor yog'ar,  
O'lkamizda kezar qish.  
Qorning qo'ynida bog'lar,  
Ko'rib yotar shirin tush.  
Bu faslni bolalar,  
Jon-u dildan sevirar.  
Yangi yil shu faslning,  
Shohona bayramidir.  
O'ynab-kulib ta'tilni,  
O'tkazamiz xursand-shod.  
Yoshlar yili – bu yili  
Unutmaymiz umrbod.

**Mohira  
ALIMUHAMMEDOVA,**  
286-maktabning 4-«V» sinf  
o'quvchisi



## SOVG'A UCHUN

Qish keldi-yu qish keldi,  
Qorbobolar xush keldi.  
Katta bayram – Yangi yil,  
Bolalarga «ish» keldi.

Maktabda ko'pdin bayram,  
Uyda ham katta bayram.  
Chiroqlar yilt-yilt yonar,  
Tun va kun bo'lar hamdam.

Ayozda tun qo'ynida,  
Turar ajib Qorbobo.  
Qopida sovg'a emas,  
Muz, qorlari bor bobo.

Biz bolalar yugurdik,  
O'ylabmiz bari chin deb.  
Bolalar yasashibdi,  
Bizga sovg'a uchun deb.

**Botir RAMAZONOV**




## MENING AZIZ DIYORIM

Toshkent chiroyli, ko'rkam,  
Samarqand qalb quyoshi.  
Shundaydir mening o'lkam,  
Ozodlikning yo'ldoshi.

Andijon aziz diyor,  
Namanganda husn bor.  
Farg'ona go'zal shahar,  
Unda muhabbat bisyor.

Shundan-da O'zbekiston,  
Go'zal va olamjahon!  
Qiyoslashga vaslini  
Topolmaydi Nurjahon.



Tomda  
yashaydigan  
Karlson



Bu paytda Bolakayning dadasi, oyisi, opasi bilan akasi oshxonada o'tirishardi.

— Bolakayga kuchukcha sovg'a qilganingiz soz bo'ldi-da, — dedi oyisi dadasiga, — endi u Karlson degan yo'q narsani esidan chiqaradi. Bimbo bilan ovora bo'ladi.

### Va Bolakay haqida qissa

— To'g'ri aytasiz, — deb oyisini quvvatladi Beton. Xuddi shu vaqtda Bolakayning xonasidan jarangli kulgu, bolalarning shovqini eshitildi.

— Bir qaraylik, ular qanday o'tirishgan ekan, — dedi Bolakayning oyisi.

— Rostdan, kelinglar, eshikdan mo'ralaymiz, — dedi Beton. To'rttalovi o'rinlaridan turishdi.

Eshikni dadasi ochdi. Lekin ichkariga shundoq qaradi-yu, oyisi: — Voy, o'lmasam! — deb qichqirib yubordi. Uch bolaning o'rtasida xo'ppa semiz, pakana bir odam kulchatoy yeb o'tirar, uning og'zi-burnigacha qaymoq chaplangan edi.

Bolakay onasini ko'rib, kerildi:

— Qarang, oyijon, Karlson mehmon bo'lib keldi. Menga chiroyli hushtak ham



sovg'a qildi. Mana!

Onasining qulog'iga gap kirmas, u karaxt bo'lib Karlsonning yelkasidagi parrakka tikilib qolgan edi.

Nihoyat, u asta tilga kirdi:

— Chiqaylik bu yerdan. Yuringlar...

— Menga ham shunisi ma'qul, — dedi Karlson, — birov tepamda tikilib tursa, ovqat yeyolmayman. Uyalaman. Yo'qlab kirganlaringiz uchun rahmat!

Bolakayning ota-onasi, Bosse bilan Beton chiqib ketishdi.

— Bugun ko'rganlaringni birovga aytmanglar, — ogohlantirdi Bolakayning dadasi, — g'ing deb og'iz ochsanglar, baloga qolamiz.

— Nega, dada? — so'radi Beton.

— Negaki, tinchligimiz buziladi. «Tomlaringda uchar odam yashar emish, shu rostmi?» deb bezor qilib yuboradi odamlar. Keyin gazetaga yozishadi, televideniye qiziqadi. Bizning Bolakayga ham qiyin bo'ladi. Harqalay, ular ko'rishib turishadi-da. Xullas, sizlardan iltimos, Karlsonni hech kim ko'rmadi, unaqa odamni biz tanimaymiz. Bildik dedik — tutildik, bilmadik — qutuldik. Kelishdikmi?

Hamma rozi bo'ldi. Karlson bo'lsa, hanuz o'sha tomda, kichkina uychasida yashaydi. Jajji motorchasini vizillatib uchib yuribdi. Uning vaqti chog'. Endi uning Bolakaydan bo'lak Gunilla, Krister degan o'rtloqlari ham bor. Karlson intizor bo'lib Bolakayning qishloqdan qaytishini kutmoqda. Hademay Bolakay ham qaytadi va yana o'yinlari qiziydi.

Tamom.

### Davomi. Boshi o'tgan sonlarda.

— O'zimam ja-a quloqsiz edim-da. — U bosh chayqab, hiringlab kulib qo'yadi. Patak bo'lib ketgan soqol-mo'ylovlari orasidan lablari qizarib ko'rinib ketadi. — Bo'za ichib ot minganman-da, shu, — uning o'zi ichkilik ichgan odamni yomon ko'radi. Ammo qachonlardir bo'za ichganini yashirmaydi. — Bir yog'i yigitchilik, — deb o'zini oqlaydi. — Ot bo'zaxo'rni yoqtirmasligini qattan bilibman palakat bosib, — birdan yana nimadir esiga tushib hushyor tortadi chol.

— Yaa-aq, — deydi bir burda afti battar bujmayib, — bilganman, bilganda qandoq, otam rahmatli qulog'imga shundoq quyganki... Shayton yo'ldan urgan-da meni o'shanda, shayton padari la'nat, — u bizga boshdan-oyoq qarab oladi-da, qo'li bilan bizni nuqiganday deydi: — Sen oshqovoq kalla, paytava quloqlar, bilib qo'ylaring, bu to'rt oyoqli jonivorlar harom-xarishni illo-billo yoqtirmaydi, ha-a, unda o'zlaringdan ko'rlaring, menga o'xshab bir umrga majruh bo'b qolasanlar, — Karimboy chol bundanam zaruroq gap aytmoqchidek, ko'zlari qinidan chiqqudek bo'lib, u yoq-bu yoqqa qarab olib, sekingina deydi: — Axir otlar haqida hadislarda oyatlar keltirilgan ekan-da... Bunisinyam otam rahmatli aytganidi... shunaqa...

Karimboy cholning otasini otlarning piri, usta mustangir bo'lgan deyishadi. Qorani ko'rsa, qirq gaz osmonga sakraydigan chars otlarni ham qo'lga o'rgatib, eshakdek qilib qo'yar ekan. Aytishlaricha, mustangirning chiqmagan, sinmagan joyi qolmagan ekan. U Ahmadboy deganning



yilqilarini boqqan. Boy Sibirga quloq bo'lishini bilib, sodiq yilqiboqaridan ham, otlardan ham birakayiga qutulmoqchi bo'ladi. Otlar sug'oriladigan quduqni zaharlaydi. Mustangir otlarni sug'orishdan oldin ertalabki choyga suv olay deb quduqqa paqir tushirsa, suv bilan kalamushning o'ligi chiqadi. Bundan mustangir yomon fol oladi va quduqni qataron qiladi. Bu holni ko'rgan boy hang-

mang bo'lib qoladi. «Seniyam, otlaniyam ajaling yetmagan ekan, bu yog'i Ollohdan», deb qilgan ishini yilqiboqariga aytib beradi. Ammo mustangir boyning bu ishidan shumlanmaydi. Xotinini yoniga olib vafodor itdek «Qaydasan, Sibir», deb boyga ergashadi. Lekin u yoqlarda sen bolaga qiyin bo'ladi, deb Karimboy otlar bilan qoldirib ketadi. Karimboy boydan qolgan yilqilar bilan kolxozga kiradi... Karimboy cholga otlar bilan andarmon bo'lish ana shunaqa otameros.

— Qo'shni kommunizmdanmi? — deb o'rtog'im Zayniddinning lablari cho'chchayib, ko'zlari pir-pir uchadi. Qo'shni kolxozning nomi «Kommunizm»da o'shani so'raydi Zayniddin.

— Etdan bo'masa kerak... — deyman o'ylanib. — U yerni ham bolalarini bilaman. Bo'zsuv bo'ylariga mol boqqani tushishadi. Ahvollari bizdan xarob, yaxshimas. Nomi ulug', supراسi quruq.

— Sen nima deb o'yilaysan, qattan bo'lishi mumkin? — ijikkilaydi Zayniddin.

— Bilmasam, so'rgan bilan baribir aytmaydi, sen lektrdan so'rab yurma tag'in, xo'pmi? — deyman jo'rtga.

— Nima qipti, so'rasam so'rovraman, — deydi Zayniddin shishinib.

— Ja so'raysan-a, so'raysan, lektrri ko'rish bilan baqa bo'b qolasanku, — ataylab jig'iga tegaman

Davomi bor.



Qizginam,  
qirmizginam

Qizginam, qirmizginam,  
Ship-shirinsan-ki, biram.  
Yuzlari hilol desam,  
Ko'zlari yulduzginam.  
Sensan umrim chiroyi,  
Jonim senga fidoyi.  
Qizginam, qirmizginam,  
Yashasin, deb binoyi.

Erkin OXUNJONOV



### ASSALOMNING QUDRATI

— Na salom bor, na alik,  
Bu qanaqa yangilik?  
Tog'da bitgan bodomdek,  
Xoda yutgan odamdek.  
Qosh-u qovog'ing tushgan,  
Lab-u dahaning shishgan.  
Anqov bo'lib qoldingmi?  
Soqov bo'lib qolingmi?  
Yo og'zingga to'ldirib,  
Suvmi, talqon soldingmi?  
Endi bolam, bu holat,  
Senga uchrar doimo.  
Salom bersang, bir joying  
Kamayib qolarmi yo?  
Do'stlaringga qarasang,  
Kimki o'tsa ko'chadan:  
— Assalomu alaykum! —  
derlar darrov o'sha dam.  
Seni qancha kuzatmay,  
O'xshamaysan ularga.  
Ko'rib bunday holingni,  
Yetmas kuchim kularga.  
Kimning o'g'il-qizisan,  
Sen ham axir o'zbek-ku,  
Qo'ni-qo'shni deganday,  
Bir qosh-u bir ko'zdek-ku!  
Sen salomga bunchalik,  
Bo'lma befarq, ko'p loqayd.  
Bu kalima ko'plarga,  
Yordam bergandir bir payt.  
Qonsiragan dushmanlar,  
Bir kun qilganda zug'um,  
Bo'shshib qolgan desak:  
— Assalomu alaykum!  
Qo'lni qo'yib ko'krakka,  
Ko'rishganga ne yetsin?!  
Ochiq chehra yuz bilan  
So'rashganga ne yetsin?!  
Assalomning qudrati,  
Mana shunaqa ulkan.  
Kanda qilmaganlarga,  
Omad kelgani-kelgan.


Iskandar RAHMON

## UCHAR OTLAR

## BO'LGAN EDI...

Erkin MALIK

Qissa



## G'ALABALAR CHO'QQISI

«General bo'lishni orzu qilmagan askar askar emas», degan gapni ko'p eshitgansiz. Darhaqiqat, har bir insonning shirin orzulari, har sohaning yuksak marralari bo'ladi.

Masalan, yelkasiga sport sumkasini osib, mashg'ulotlarga qatnaydigan o'g'il-qizlarni nimadir ruhlantirib turadi: yutuqlar va chempionlik.

Sport yutuqlari oshib borgan sayin chempionlar xalq tomonidan, muxlislar-u mutaxassislarning e'tirof va ta'riflariga ega bo'ladi.

O'zbekiston futbol federatsiyasi har yili sport jurnalistlari o'rtasida «Yilning eng yaxshi futbolchisi va murabbiysi kim?» so'rovinimasini o'tkazadi.

2007 - yil yakunlari bo'yicha o'tkazilgan so'rovga ko'ra, O'zbekiston milliy terma jamoasi bosh murabbiyi **Rauf Inileyev** «Eng yaxshi murabbiy», deb topildi.

Sportsevar bolajonlar! Xabaringiz bor, Osiyo futbol konfederatsiyasi ham Rauf Inileyevni «Osiyoning 2007 - yildagi eng yaxshi murabbiyi», deb topgan edi. Terma jamoamiz hujumchisi **Maksim Shatskix** O'zbekistonning 2007-yildagi «Eng yaxshi futbolchisi» degan nomga loyiq deb topildi.

Mavsum boshida Toshkentning «Lokomotiv», so'ngra «Quruvchi» jamoasida o'ynagan hujumchi **Ihom Mo'minjonov** 24 ta to'p kiritib, yilning g'olibi bo'ldi.

Respublika «Sport» gazetasi esa sport jurnalistlari o'rtasida so'rov o'tkazib, «Yilning murabbiyi», «Yilning eng yaxshi sport jamoasi» hamda «Yilning eng yaxshi sport homiysi» nominatsiyasi aniqlandi.

Unga ko'ra, professional boks bo'yicha WVA yo'nalishida jahon chempionligiga erishgan Ruslan Chagayev «Yilning eng yaxshi sportchisi» deb topildi.

Demak, Rauf Inileyev – «Eng yaxshi murabbiy», Turkiyada jahon chempionligiga erishgan O'zbekiston nogironlar futbol terma jamoasi – «Eng yaxshi jamoa» nomini qo'lga kiritdi.

Sport va futbol fidoiysi yaypanlik Olimjon Akbarov farzandlari – «Eng yaxshi sport homiysi» bo'lishdi.

## MURABBIYNING



yoki  
ta'tilning  
unutilmas  
voqeasi

TANBEHI

Yangi yilning ilk kunlarida boshlangan ta'til sportsevar bolajonlarning bolalik onlaridagi, sport maydonidagi esda qolarli voqealarga boy bo'lmoqda. Keling, yaxshisi tengdoshingiz, «Paxtakor» futbol akademiasining darvozaboni Sardorbek Sodiqov haqidagi voqeani so'zlab beray:

Penalti! Bu to'pni o'tkazib yubormasam bo'lgani!

Musobaqalarning birida, aniqrog'i, «Paxtakor» va Bekobodning «Metallurg» jamoalari uchrashuvida toshkentliklar darvozaboni Sardorbekning harakatlariga yaxshi baho berishdi. Jamoaning 9 yoshli darvozaboni o'sha kuni shunday ajoyib o'yin ko'rsatdiki, uning to'pga tashlanishlari, uzoq va yaqindan berilgan zarbalarni bexato bartaraf etishi muxlislar va murabbiylar olqishiga sababchi bo'ldi.

Darhaqiqat, darvozabonning chaqqonlik bilan harakat qilishi tahsinga loyiq edi. O'yinda hisob 1:1, uchrashuv tugashiga 3 daqiqa qolganda, darvozabon murabbiydan o'zini almashtirishni so'radi. Sababi, durang natijani raqiblar ilib ketishidan qo'rqandi.

O'yindan so'ng, jamoaning qattiqqo'l murabbiyi Lenur Yeremeyev darvozabonni yoniga chaqirib, dakki berdi:

– Agar sen maydondagi bunday vaziyatlardan qo'rqsang, yaxshi darvozabon bo'lolmaysan. Bilib qo'y, sport – jasoratni yaxshi ko'radi.

Rost, bu vaziyatda murabbiy Sardorni urishmasa ham bo'lardi. Chunki uning jajji shogirdi, darvozabon o'z vazifasini ishonchli ado etgandi. Biroq, sportda oddiylikdan oshirib, 2-3 karra mashaqqatlarda toblangan bolalargina haqiqiy sportchi bo'lib yetishadi.

Bugun yaxshi o'ynasa-da, murabbiydan tanbeh eshitgan darvozabon vaqti kelib katta-katta yutuqlarga erishganida, murabbiyining haqligiga ming karra amin bo'ladi.

Sahifani Ma'mura MADRAHIMOVA tayyorladi, suratlar muallifi: FODILOVA



Shohruh Mahmudxo'jayev 1998-yilda Namangan viloyati, Chust shahrida tug'ilgan. Hozirda poytaxtimizdagi 74-maktabning 4-«A» sinfida a'lo baholarga o'qiydi. Shuningdek, mamlakatimiz bosh jamoasi «Paxtakor»ning bolalar futbol akademiyasi a'zosi. Ampulasi – hujumchi.

Ikki yil avval Shohruhning dadasi uni yashil maydonga boshlab kelgandi. O'shanda u 7 yoshda edi. Chunki ikki yoshidanoq to'pni tanigan bu bolakayning futbolchi bo'lishini ota-onasi yaxshi bilishardi.

Maydonda uning iste'dodini sinab ko'rgan murabbiy bir-ikki o'yindayoq

## TO'PDA AKS ETGAN QUYOSH


hujumchilikka tanladi. Sababi, Shohruh to'p bilan juda yengil harakat qilardi. Mashg'ulotlarda kun sayin uning yaxshigina zarbasi, yuqoridan top urish qobiliyatini bilgan murabbiy tez kunda jamoaning asosiy tarkibiga kiritdi. To'g'ri, futbol akademiyasida Shohruh kabi iste'dodlar ko'p. Yusuf, Aziz, Temur, Otabek, Umar-bularning barchasida futbolga bo'lgan qiziqishdan ko'ra, mahorat kuchliroq.

Barcha sport maydonining o'z formasi bor. Chiniqish, mashg'ulotlarda toblanish, musobaqalarda g'oliblik uchun bellashish kabi muhim jihatlarga o'rganmagan bola yaxshi sportchi bo'la olmaydi.

Qishki ta'tilning musobaqalari futbolchi bolalarni yana bir sinovdan o'tkazdi. Jamoasiga har o'yinda 4-5 tadan gol kiritgan Shohruh hujumchi nomini yana-da mustahkamladi. U musobaqaning «Eng yaxshi hujumchisi» degan diplomi bilan taqdirlandi. Biz uning yashil maydondagi ilk yutuqlari bilan tabrikladik. U esa:


– Hali ko'p gollar kiritib, murabbiyim Lenur Erkinovich istagan futbolchi bo'laman. Hozirgacha maydonda o'rtoqlaringa dribling (to'p uzatish) va kalla bilan to'p urishni, to'pni aylantirib tepishni o'rgandim, deydi ishonch bilan. – Niyatim – kelajakda Anvar Soliyev va Aleksandr Genrix kabi to'purar bo'lish. Dunyoning oltin to'p sohiblari Ronaldino va Andrey Shevchenkoning yutuqlari kabi yuksak marralarga erishishni xohlayman. Yevropa klublaridan «Barselona»da ham to'p surishni orzu qilaman.

Axir maydondagi to'p Shohruh uchun misoli quyosh. Uning kelajagi, orzulariyam to'p bilan bog'langandek... Bolalikning beg'ubor orzularini, «Barselona»dagi afsonaviy futbolchi Luis Suaresga qiyosladim.



Yusuf, Shohruh va Hamidulla bir tarkibda o'ynaydilar.

# BILASIZMI?



## BOLALAR TELEVIZORNI QANCHA KO'RISHLARI MUMKIN?

Maktabgacha tarbiya yoshidagi bolalar kuniga 20-30 daqiqa, 14 yoshgacha bo'lgan o'quvchilar esa bir soat televizor ko'rishlari mumkin. Televizor ko'rib bo'lgan zahotiyuq, uxlash yaramaydi. Ular uyquga yotishdan bir soat oldin televizor ko'rishni to'xtatishlari kerak.

Televizor ko'rish ko'zga ziyon qiladimi?

Shuni aytish kerakki, televizorni 2-5 metr naridan ko'rish shart, bunda odam gavdasini bukmasdan, qaddini rostlab o'tirib, uni tomosha qilishi kerak. Divanga yonboshlab, karavotga yotib televizor ko'rish ko'zga ziyon qiladi.


## ENG ZARUR NARSA

So'radim:

- Ey ustoz, Xudodan nima tilasam, barcha yaxshiliklarni so'ragan bo'laman.
- Ya'ni, uch narsa: sog'lik, xotirjamlik, boylik.
- Inson hayoti uchun eng zarur narsa nima?
- Farog'atlik va xotirjamlik.

## OB-HAVONING SOG'LIQQA TA'SIRI BORMI?

Qishda yozga nisbatan kislorod bir yarim barobar ko'payadi. Shuning uchun havo harorati sovuq bo'lgan paytda, yurak qon tomir kasalligi bilan og'riqanlar o'zlarini yaxshi his etadilar.



Hindistonlik Vikos ismli navqiron o'smir bugungi kunda yer yuzining eng novcha bolasi sifatida tan olindi. Hozirgi kunda uning bo'yi 2,5 metrni tashkil etadi.

Vikos ayni damda 17 yoshda. Og'irligi 195 kilogramm. 45 o'lchamli oyoq kiyim kiyadi.

Shifokorlarning ma'lumotlariga qaraganda, bola hali yana o'sarmish...



Rossiyaning «Goziro - Medil» xolding kompaniyasi Yangi yil arafasida jazzi o'g'il-qizlarga ajoyib sovg'a tayyorladi. Ular 2007-yilning 25-dekabridan boshlab Rossiyada kun-u tun uzluksiz ishlaydigan «Bolalar radiosi»ni ishga tushirdilar. Bu radioni kamida 50 million kishi eshitish imkoniyati mavjud.

Radio-eshittirishlar uch yoshdan o'n ikki yoshgacha bo'lgan bolalarga hamda ularning ota-onalariga, bolalar tarbiyasi bilan shug'ullanadigan mutaxassislariga mo'ljallangan.

Shri Lankada 18 yoshga kirmaganlarning uyali telefondan foydalanishlari man etib qo'yildi. Bundan ilgari Hindistonda 16 yoshga kirmaganlar ana shunday imkoniyatdan mahrum etilgan edilar.

Mamlakat ayollar va bolalar masalalari bo'yicha vazirlik vakilining ta'kidlashicha, mobil telefonlari yoshlarning ongiga salbiy ta'sir o'tkazmoqda.

- Uyali telefonlardan joy olayotgan behayo va vahshiylikni targ'ib etuvchi surat va videorolik yoki qo'shiqlar bolalar tarbiyasini izdan chiqarmoqda, - deydi vazir Sumetxi Jaseni.

# SKANVORD

|                       |                    |                  |                |                         |               |                   |                |
|-----------------------|--------------------|------------------|----------------|-------------------------|---------------|-------------------|----------------|
| Millat                |                    |                  |                | Hisobdagi qiyosiy yakun |               |                   | Faxr           |
| Idish                 | Qon so'ruvchi      | Savdo keli-shuvi |                |                         | Shirin-lik    | So'z boyligi Odat |                |
|                       | Boylik             |                  |                |                         |               | Rangli metall     | Shoyi ashyo si |
|                       | Tutqun             |                  |                | Yaqin kishi Jonivor     | Imorat        |                   |                |
|                       |                    |                  | Orol-dagi yurt |                         |               |                   | Pasttekislik   |
|                       |                    |                  |                |                         | Taqinchoq     | 30 kun            |                |
| O'tga chidamli ma'dan |                    | Tanga bosish     |                | Beruniy                 | Foyda         |                   |                |
| Chidam                |                    | Mumtoz shoir     |                |                         | Chiroy        | Ilon yili         | Nok navi       |
|                       | Man-sab            |                  |                |                         |               | Ochqich           |                |
|                       |                    |                  |                | Dunyo tomoni            | ...jom Shahar | Ne'mat            | Tog'lik        |
|                       | Odam-zod           |                  |                |                         |               | Tok mevasi        | Pilla-poya     |
|                       | Farzandning bolasi | Birinchi darslik |                |                         | Avto qism     |                   | Ibo            |
|                       |                    |                  |                |                         |               | Dori-vor          |                |
|                       | Futbol qismi       | Afrika davlati   |                |                         | Arab harfi    |                   | Cha-har-yor    |
|                       |                    |                  |                | Lah-za                  |               |                   |                |